

Personal di Museo Historico Arubano a tene encuentro cultural fructifero na Corsow

Directiva di Fundacion Museo Arubano tambe a participa

ORANJESTAD

Recientemente staf, personal y voluntario di Museo Historico Arubano na Fort Zoutman hunto e miembronan di directiva di Fundacion Museo Arubano tabata tin un encuentro cultural fructifero

na Corsow. Durante dos dia a bishita Curaçao Museum, Postmuseum, Museo Maritimo, Museo Hudiu Cultural Historico, Museo Kura Hulanda y e museo den De Fortkerk.

E viahe pa Corsow mester a tuma lugar aña pasa pero pa razon nan financiero e no por a ser realiza prome cu 24 augustus 2007. Fundacion Museo Arubano pa hopi tempo a concentra riba diferente proyecto di mesun



importancia. A reorganisa e coleccion historico den Museo Historico Arubano cu ayudo di UNOCA y a drecha enter otro e dak di Willem III toren cu ayudo di Prins Bernard Cultuurfonds. Tambe cu apoyo financiero di UNOCA a produci un guia cu informacion historico pa studiantenan di IPA cu lo ser introduci pronto na skol na Aruba. Banda di e proyectonan grandi Fundacion Museo Arubano a realiza hunto cu gremionan comercial y gubernamental proyectonan chikito pa mehora e estado di Museo Historico Arubano.

Cu e viahe pa Corsow na luna di augustus di e aña aki directiva di Fundacion Museo Arubano a logra un otro meta di masha hopi importancia. Esey ta upgrade e capacidad di e empleadonan di museo. E aspecto di desaroyo personal di e trahador di museo a ser negligisha pa basta tempo, apesar cu un par di biaha directiva a logra haci algo na esey.

E desaroyo di e personal ta un aspecto sumamente importante pa directiva di Fundacion Museo Arubano, mirando e hecho cu henter aña Museo Historico Arubano ta wordo bishita pa hopi turista y hende local. Empleadonan mester ta motiva pa haci e trabao. Sin

motivacion y capacitacion e servicio di Museo Historico Arubano no por wordo garantisa. Bishitantenan mester haña informacion corecto di nos historia arubano y un bon guia den museo. Capacitacion di trahador di museo ta un desaroyo continuo.

Fuera di manda e personal pa diferente workshops y cursonan durante 2007 directiva di Fundacion Museo Arubano kier a realiza un bishita na Corsow. E intercambio cultural durante e bishita na Corsow a yuda cristaliza idea nobo pa mehora e servicio na museo, promove historia y cultura di nos pais y ideanan pa hasi museo mas atractivo. Por ehempel dor di brinda maniobra y presentacionnan tipico di nos historia cultural. Finalmente e museonan di Corsow cu a wordo bishita a ser invita pa directiva di Fundacion Museo Arubano pa bishita Aruba y wak kiko Museo Historico Arubano na Fort Zoutman tin di ofrece.

Tambe directiva di Fundacion Museo Arubano ta agradeci tur instancia y hende cu di un of otro manera a contribui na e exito di e viahe di Museo Historico Arubano pa Corsow.